

qui subscripsit Concilio Cabilonensi anno 650. *Sophronius* autem Veromandensis Aurelianensi primo.

CAMERACUM, Camaracum Antonino in Itinerario, vulgò *Cambray*. *S. Vedastus* Episcopus constitutus dicitur à D. Remigio, Ecclesiæ Cameraensis & Atrebatensis, apud Baldricum in Chronico lib. 1. cap. 7. quo ait his duobus Ecclesiis ante Hunnorum irruptionem duos præfuisse Episcopos. Sedit autem in Atrebatensi, sed *Gaugericus* huic succedens ad Cameracensem urbem sedem transtulit, licet in Atrebatensi illius diœcesis Episcopalia tractarentur: idque ita fuisse usque ad Urbani II. tempora, qui Atrebatensi proprium Pastorem præfecit, in Cod. MS. Bibliothecæ Thuanæ legere est. Nec id inusitatum erat prioribus sæculis, ut idem Episcopus duas proprias sedes haberet in sua diœcesi. *Bertoaldus* hujus Episcopus interfuit Concilio Remensi anno 630. diciturque tantum Cameracensis.

TORNACUM Antonino Nerviorum civitas, vulgò *Tournay*. *Superior* Nerviorum Episcopus adfuit Concilio Agrippinensi.

SILVANECTIONUM Gregorio Turon. lib. 9. hist. cap. 20. vulgò *Senlis*. *Livianus* hujus Episcopus subscripsit Concilio Aurelianensi primo, & *Gonotigerus* Aurelianensi quinto.

BELLOVACORUM CIVITAS Notitiæ Imperii Romani, vulgò *Beauvais*. *S. Lucianus* hujus civitatis Apostolum, non pauci etiam primum Episcopum fuisse scribunt: sed Martyrologium Romanum eum Presbyterum tantum nominat. *Clementis* Bellovacensis Episcopi certiore mentionem facit *S. Audoenus* Rothomagensis Episc. in vita *S. Eligii* Noviomensis.

CIVITAS AMBIANENSIVM dictæ Notitiæ Galliæ, vulgò *Amiens*. *Eulogius* hujus Episcopus interfuit Concilio Agrippinensi, & *Edibius* Aurelianensi primo.

TARUANNA, Morinorum civitas, Ptol. lib. 2. cap. 9. vulgò *Therouenne*. *Antimundus* hujus Episcopus dicitur, apud Meyerum, constitutus à *S. Remigio*, qui & *Armundus* vocatur in Cod. Thuan. Attamen Teruannensem Episcopum non legi in libris certioris fidei ante *Ætherium*, cujus mentio fit in Epistola Zachariæ Papæ.

BONONIA dictæ Notitiæ Galliæ, vulgò *Boulogne*, Episcopalis fuit, si credimus *Hincmaro*, Epistola 6. ad Episcopos Remensis diœcesis cap. 18. Nusquam tamen apud præfatos, Episcopi Bononiensis memoriam vidi, sed tantum à *Caroli* quinti temporibus, quo imperante, Taruannensis sedes translata est Bononiam, pro ea parte diœcesis quæ est in Francia, nec non Audomaropolim pro ea quæ est in Artesia, & Ipram pro tertia seu ultima parte quæ est in Flandria.

PROVINCIA LUGDUNENSIS, SEU LUGDUNENSIS PRIMA.

LUGDUNUM Ptol. lib. 2. cap. 8. vulgò *Lyon*, Galliæ Metropolis dicitur apud Eusebium lib. 5. Hist. Eccl. cap. 1. *Photinus* hujus Episcopus appellatur ibid. necnon *Ireneus* ejus successor eodem lib. cap. 6.

MATISCO Cæsari de Bello Gallico lib. 7. sub fin. vulgò *Mascon*. *Placidius* hujus Episcopus subscripsit Concilio Aurelianensi tertio.

CABILONUM, Cabullinum Ptol. lib. 2. cap. 8. vulgò *Chalons sur Saône*. *Donatianus* hujus Episcopus interfuit Concilio Agrippinensi.

CIVITAS LINGONUM dictæ Notitiæ, vulgò *Langres*. *Desiderius* hujus Episcopus interfuit Concilio Agrippinensi, & *Gregorius* Epaonensi.

AUGUSTODUNUM Ptol. lib. 2. cap. 8. vulgò *Autun*. *Rheticus* hujus Episcopi meminit *D. Hieronymus* lib. de Script. Eccles. cap. 93.